

Naligiissitaaneq assigiinngisitsinnginnissarlu pillugit Inatsisartut inatsisaat

Kapitali 1

Inatsisip siunertaa atuuffissaalu

§ 1. Inatsisartut inatsisaanni siunertaavoq, assigiinngisitsinernik akiuiniarnissaq aammalu suaassutsip, naartunerup, meeravissartaarnerup, erninermi sulinngiffeqarnerup, kinguaassiutitigut sammiviup, suaassutsini kinaassuseqarnerup, suaassutsimik takutitsinerup, suaassutsit ilisarnaataasa, kingoqqiffiup, ammip qalipaataata, inuiaqatigiinni, inooqatigiinnermi imaluunniit inuianni pinngorfiup, innarluuteqarnerup, ukiut, politikikkut isiginnittaatsip, upperisap imaluunniit upperisaqarneq apeqqutaatinnagit naligiimmik pisinnaatitaaffeqarnerup periarfissaqarnissallu qulakkeernissaat.

§ 2. Inatsisartut inatsisaat inuiaqatigiinnut tunngasuni tamani atuuppoq, takukkilli imm. 2 aamma 3.
Imm. 2. Inatsisartut inatsisaat ilaqutariit inuuneranni assigiinngisitsinermik allatulluunniit namminiinnarmut tunngasunut atuutinnilaq.

Imm. 3. Inatsisartut inatsisaat atuuppoq pisinnaatitaaffit pitsaannerusumik inatsisini allani maleruagassaniluunniit aalajangersarneqarsimanngimmata.

Kapitali 2

Assigiinngisitsinissamik inerteqquteqarneq

§ 3. Inuup Inatsisartut inatsisaat malillugu pisinnaatitaaffini taamaatissinnaanngilai.

Imm. 2. Aalajangersakkat, isumaqatigiisummut uppersaarsaatit, isumaqatigiissutit, maleruagassat maleruagassallu il.il. inatsimmik unioqutitsisut, atuuttussaannigillat.

§ 4. Kinaluunniit inummut allamut suaassuseq, naartuneq, meeravissartaarneq erninermi sulinngiffeqarneq, kinguaassiutitigut sammivik, suaassutsini kinaassuseqarneq, suaassutsimik takutitsineq, suaassutsit ilisarnaataat, kingoqqiffik, ammip qalipaataa, inuiaqatigiinni, inooqatigiinnermi imaluunniit inuianni pinngorfik, innarluuteqarneq, ukiut, politikikkut isiginnittaaseq, upperisap imaluunniit upperisaqarneq pissutigalugit assigiinngisitsinissanngilaq. Inerteqqummi toqqaannartumik imaluunniit toqqaannanngitsumik assigiinngisitsinerit pineqarput.

Imm. 2. Inuk tunngavissarititaasut imm. 1-imi taaneqartut pissutigalugit inuup allap assigisaanik inissisimasup pineqarsimaneranut, pineqarneranut imaluunniit pineqartussaagaluarneranut sanilliullugu ajornerusumik pineqarpat, toqqaannartumik assigiinngisitsisoqarsimassaaq.

Imm. 3. Aalajangersakkap, piumasarisap imaluunniit suleriaatsip, arlaannaannulluunniit atarpasinngitsup, inuit ilai, inunnut allanut sanilliullugu suaassuseq pissutigalugu immikkut inissitsissappagit, imaluunniit suaassuseq, naartuneq, erninermi sulinngiffeqarneq, kinguaassiutitigut sammivik, suaassutsini kinaassuseqarneq, suaassutsimik takutitsineq, suaassutsit ilisarnaataat, kingoqqiffik, ammip qalipaataa, inuiaqatigiinni, inooqatigiinnermi imaluunniit inuianni pinngorfik, innarluuteqarneq, ukiut, politikkikkut isiginnittaaseq, upperisaq imaluunniit upperisaqarneq pissutigalugit arlaatigut inississappatigut, toqqaannanngitsumik assigiinngisitsisoqarsimassaaq. Taamaattoq aalajangersagaq, tunngavigisaq imaluunniit suleriaaseq pineqartoq inatsisinut naapertuuttumik kinaassusersiunngitsumik tunngavilersuutitaqarpat aammalu siunertap taassuma naammassinissanut aningaasassat naapertuuppata pisariaqarpatalu, taana atuutissanngilaq.

§ 5. Nakkarsaanerit suulluunniit kiisalu nuanninngitsumik pineq, inuup taamatut pissusilersornermik akuersiumannginnera imaluunniit akuersaarnera aallaavigalugu, Inatsisartut inatsisaannut matumunnga naapertuuttumik assigiinngisitsinertut isigineqassaaq.

Imm. 2. Inuup naleqassusaata innarlernissaa aammalu qunusaarisumik, akeqqersimaartumik nakkarsaasumik, nikanarsaasumik imaluunniit nuanninngitsumik akaareqatigiinnginnissaaq siunertaralugu imaluunniit taamatut sunniutilimmik, assigiinngisitsinermut tunngaviusunut § 4-mi taaneqartunut atatillugu kissaatigineqanngitsumik pissusilersortoqarpat, nakkarsaaneq pisimassaaq.

Imm. 3. Kinguaassiutitigut innimiilliorneq tassaavoq, pissusilersorneq kinguaassiutinut tunngasoq piumaneqanngitsoq. Pissusilersorneq tassaasinnaavoq oqaatsit atorlugit oqaasertaqanngitsumik, digitalimik timikkulluunniit pissusilersorneq, i. Pissusilersornermi siunertaavoq inuup naleqassusaanik innarliiniarneq. Pissusilersorneq qunusaarisumik, akeqqersimaartumik, nakkarsaasumik, nikanarsaasumik imaluunniit nuanninngitsumik kinguneqarsinnaavoq.

§ 6. Assigiinngisitsinermut tunngaviit § 4-ami taaneqartut pissutigalugit inuk assigiinngisitsivigineqarnissaaq imaluunniit nakkarsarneqarnissaaq ilitersuineq, assigiinngisitsinertut imaluunniit nakkarsaanertut Inatsisartut inatsisaanni matumani isigineqarpoq.

§ 7. §§ 4-6 aamma § 15 unioqutillugit assigiinngisitseqataanissaaq inerteqqutaavoq.

Assigiinngisitsinissamik inerteqquteqarnermi ilaatinneqanngitsut

§ 8. §§ 4-7 aamma § 15 apeqqutaatinnagit, inatsisinut naapertuuttumik siunertami kinaassusersiunngitsumik tunngavilersugaappat, tamatumalu naammassinissanut aningaasassat naapertuuppata pisariaqarpatalu, Inatsisartut inatsisaat una assigiinngisitsinissamut ajoqutaanngilaq.

Imm. 2. Imm 1 suaassuseq imaluunniit immikkut inuiaassuseq tunngavigalugit toqqaannartumik assigiinngisitsinermut tunngatillugu atuutinngilaq.

Imm. 3. 4-miit 7 ilanngullugu § 15 apeqqutaatinnagit, atorfinitsitaanermi atugassarititaasuni kalaallisut oqaatsit atorneqarnissaaq pillugu aalajangiinissamut Inatsisartut inatsisaat manna akornusiinngilaq.

§ 9. §§ 4-7 aamma § 5 apeqqutaatinnagit, iliuusissat immikkuullarissut suaassutsimut, naartunermut, meeravissiartaarnermut, erninermi sulinngiffeqarnermut, kinguaassiutitigut sammivimmut, suaassutsini

kinaassuseqarnermut, suaassutsimik takutitsinermut, suaassutsit ilisarnaataannut, kingoqqiffik, ammip qalipaataanut, inuiaqatigiinnut, inooqatigiinnermut imaluunniit inuianni pinngorfimmut, ukiunut, politikikkut isiginnittaatsimut, upperisamut imaluunniit upperisaqarnermut atasumik ajoqutissartaasut pitsaaliornissaannik imaluunniit naligiissinnissaannik siunertaqartut atuutsinnissaannut imaluunniit akuerinissaannut Inatsisartut inatsisaat una akornutaanngilaq.

Imm. 2. Iliuusissat immikkuullarissut imm. 1 naapertorlugu aallartinneqartut, iliuusissat siunertaasa naammassineqarsinnaalernerat tikillugu taamaallaat atuutsinneqarsinnaapput.

§ 10. Inatsisartut inatsisaat una §§ 4-7 aamma § 15 apeqqutaatinnagit, siunertaq akuerisaasumik siunertaqarnermik tunngaveqarpat aqqullu siunertap taassuma angunissaanut naleqquppat pisariaqarpallu taamaallaat salliutilluguluunniit suaassutsimi aalajangersimasumi inunnut tunngatinneqarpat sullissinissamut il.il. akornutaanngilaq.

§ 11. Suliffeqarfik, sulisitsisup sulisitsiffigisaa, upperisamik sammisap imaluunniit upperisap aalajangersimasup siuarsarneqarnissaanik siunertaqartoq oqaatigineqarsimappat, aamma tassani sulisitap upperisamik sammisaminik aalajangiussisimanera imaluunniit upperisaa suliffeqarfimmut tassunga pingaaruteqartutut isigineqassappat, §§ 4-miit 7 ilanngullugu apeqqutaatinnagit Inatsisartut inatsisaat manna malillugu sulisitsisup sulinermik inuussutissarsiuteqartumik atorfeqarnermi atugassarititaasut ilaanni, sulisitap aalajangersimasumik upperisarsiornissaa imaluunniit upperisaqarnissaa pillugu piumasaqaateqarnissaa akornutaanngilaq.

§ 12. §§ 4-7 aamma § 15 apeqqutaatinnagit, taanna inatsimmik malitassanilluunniit allanit, tassunga ilanngullugit ataatsimut isumaqatigiissutit aamma sulisut kattuffisa isumaqatigiissutaannik tunngaveqarpat, ukiut pissutigalugit assigiinngisitsisoqarsinnaavoq.

Kapitali 3

Iliuuseqarluni naligiissitaanermik assigiinngisitsinninnissamillu suliaqarneq

§ 13. Pisortani oqartussat sulisoqarfiillu inatsisinik allaffissornikkullu aalajangersakkanik, politikkinik aammalu suliassaqaarfinni Inatsisartut inatsisaanni uani pineqartuni ingerlatassanik ilusilersuinerminni piviusunngortitsinerminnilu suaassutsit akornanni naligiissitsinnissamik siunertaqarnerup aammalu assigiinngisitsisoqannginnissaata iliuuseqarlutik mianersuunnissaannik pisussaaffeqarput.

§ 14. Pisortani namminersortunilu sulisitsisut naligiissitsilernissaq § 4-ami immikkoortut tunngavigalugit assigiinngisitsinissap pinngitsoortinnissaa, sulisitsisut aqqissuussaaffianni kattuffiini suliffeqarfianniluunniit iliuuseqarlutik, siunnerfilimmik pilersaarutaasumillu sulissutigissavaat, aammalu nakkarsaaneq aamma kinguaassiuutitigut innimiilliorneq pinngitsoortinniassallugit. Suliaqarnermi ilaatigut sulisussarsiorneq, aningaasarsianut sulinernullu atugassarititaasut, atorfimmi qaffasinnerusumik inissitsinneqarneq, ineriartornissamut periarfissat aammalu sulinerup ilaqtariittullu inuunerup ataqatigiissinnissaannut periarfissaqarneq, pineqartunut ilaatinneqarput.

Kapitali 4

§ 15. Kapitali 2-mi assigiinngisitsinissap inerteqqutigineqarnera suliffeqarnermut tunngasortaannut tamanut atuuppoq. Taasani ilaatigut pineqartunut ilaapput:

- 1) Allagarsiissuteqarneq
- 2) Atorfinititsineq, allamut inissiineq atorfirmilu qaffasinnerusumik inissitsinneqarneq
- 3) Aningaasarsianut sulinermullu atugassarititaasut
- 4) Soraarsitsineq.

Imm. 2. Sulisitsisup sulinermik inuussutissarsiuteqartoq soraartissinnaanngilaa, taanna matumani inatsit malillugu piumasaqaammik saqqummiussaqaarsimappat, taamatullu sulinermik inuussutissarsiuteqartoq Naligiimmik Pinninnissaq Pillugu Aalajangiisartunut naammagittaalliuteqaarsimappat.

§ 16. Sulinermik inuussutissarsiuteqartumik atorfinitsitsinermut atatillugu, sulisitsisup naartuneq, meerartaarnissamik pilersaaruteqarneq, qitornavissiartaarneq, meerartaarnermut atatillugu sulinngiffeqarneq, kinguaassiutigut sammivik, suaassutigut kinaassutsit, suaassutsimik takutitsineq, suaassutsip qanoq ittuunera, inuiaat ilisarnaataat, ammip qalipaataa, inuiaqatigiinnut, inuttut inooqatigiinnikkullu imaluunniit inuiannut tunngasumik pilerfik, innarluuteqarneq, politikkikkut isummat, upperisaq imaluunniit aalajangersimasumik upperisaqarneq, pillugit paasissutissanik pissarsiniarsinnaanngilaq imaluunniit paasissutissanik atuisinnaanngilaq.

Imm. 2. Sulisitsisoq sulinermik inuussutissarsiuteqartoq atorfeqartitsinermini naartuneq, meerartaarnissamik, meerarsiartaarnissamik, erninermi suliffeqarnissamik pilersaaruteqarneq, atoqatigeeriaaseq, suaassutsimi kinaassuseq, suaassutsimik takutitsineq, suaassutsinut ilisarnaatit, raci, ammip qalipaataa, inuiaat, inuttut atukkatigut imaluunniit immikkut inuiaassuseqartunit pinngorfiit, innarluut, politikkikkut isiginneriaaseq, upperisaq upperisaqarnerluunniit pillugit paasissutissanik qinnuiginnissanngilaq atuisinnaaniluunniit.

Imm. 3. Paasissutissat sulinerup imaluunniit inuussutissarsiornerup ingerlannissaanut aalajangiisuulluinnartumik pingaarteqarpata, imm. 1-imi oqaatsit piginnaasat, upperisaq innarluuteqarnerlu pillugit paasissutissanik piniarnissamut killiliinngilaq.

§ 17. Sulisitsisup naartuneq, erninermi sulinngiffeqarneq imaluunniit meeravissiartaarneq pissutigalugit, naartunermut, erninermi sulinngiffeqarnermut meeravissiartaarnermullu atatillugu sulinngiffeqarneq pillugu Inatsisartut inatsisaat qaqugukkulluunniit atuuttoq naapertorlugu sulinermik inuussutissarsiuteqartup sulinngiffeqarnissamik piumasaqarnera pissutigalugu sulinermik inuussutissarsiuteqartoq soraartissinnaanngilaa.

Imm. 2. Piffissaq sulinermik inuussutissarsiuteqartup sulinngiffeqarneq pissutigalugu sulinnginnera atornerqarsimanerup sivissussusiata naatsorsornerani ilanngunneqassaaq, tak. naartunermut, inernermi suliffeqarnermut meeravissiartaarnermullu atatillugu sulinngiffeqarneq pillugu Inatsisartut inatsisaat. Aalajangersakkami soraarninngornermi pissutsit pineqanngillat.

Imm. 3. Angajoqqaat naartunermi, erninermi meeravissiartaarnermilu sulinngiffeqarneq pillugit Inatsisartut Inatsisaat naapertorlugu pisinnaatitaaffimminnik atuisimasut suliffitoqqaminnut imaluunniit assigisaanut, naartunermi, erninermi meeravissiartaarnermilu sulinngiffeqarneq pillugit Inatsisartut

Inatsisaat naapertorlugu, uternissamut pisinnaatitaapput. Angajoqqaat suliffimmi atukkanik pitsanngorsaanerit tamaasa sulinngiffeqarnerup kingorna pisinnaatitaasatik pisinnaatitaaffigai.

§ 18. Sulisartut, aningaasarsianut atugassarititaasut aalajangersarneqarnerat pillugu assigiinngisitsisoqartoq pasitsaassaqartut, sulisitsisoq atorfinni sanilliunneqarsinnaasuni nalinginnaasumik aningaasarsiat annertussuserisartagaat aammalu aningaasarsianut atugassarititaasunik aalajangersaanissamut tunngavissarititaasut pillugit allaganngorlugu paasissutissiissasoq, piunasaqarsinnaapput.

Imm. 2. Aalajangersagaq una malillugu aningaasarsiat pillugit paasissutissanik tigusaqartoq nipangiussisussaataavoq aammalu nipangiussinissamut uppersaasat atsiussallugu.

§ 19. Naartunermi, erninermi imaluunniit meeravissartaarnermi inuit illersorneqarnissaat pillugu aalajangersakkanik iluaquusiinerusussanik atuutsitsilernissamut imaluunniit atuutsitsiinnarnissamut Inatsisartut inatsisaanni aalajangersakkat akornutaanngillat.

Kapitali 5

Inuussutissarsiornikkut imaluunniit tamanut iluaqutaasussatut suliffeqarfiup iluani maleruagassat immikkut ittut

§ 20. Inuussutissarsiornikkut imaluunniit tamanut iluaqutaasussatut suliffeqarfiup iluani, inuup kingoqqiffik, ammip qalipaataa, inuiaqatigiinni imaluunniit inuiaassutsikkut sumingaanneerfia, upperisaa imaluunniit kinguaassiutitigut sammivia, suaassutsini kinaassuseqarnera, suaassutsimik takutitsinera imaluunniit suaassutsini ilisarnaatai pissutigalugit allatuulli atugassarititaasut assingi tunngavigalugit inuit sullikkumaneqannginnerat, inerteqqutaavoq.

Imm. 2. Taamatuttaaq sumiiffimmut, takutitsivimmut, saqqummersitsivimmut, katerisimaartunut assigisaannulluunniit, tunngavissat imm. 1-imi taaneqartut pissutigalugit tamanut ammasumut, atugassarititaasut assingi tunngavigalugit inuup isertikkumannginnissaa, inerteqqutaavoq.

Imm. 3. Aalajangersakkami mianersuaalliornermi pissutsit ilaanngillat.

Kapitali 6

Naligiimmik Pinninnissaq Pillugu Aalajangiisartut

Aalajangiisinnaatitaaneq aamma aaqqissuussaaneq

§ 21. Nalaakkersuisut Naligiimmik Pinninnissaq Pillugu Aalajangiisartunik politikkikkut sumulluunniit attuumassuteqanngitsunik pilersitsissapput.

Naligiimmik Pinninnissaq Pillugu Aalajangiisartut tunngavissarititaasut una inatsimmi illersorneqartut pissutigalugit assigiinngisitsinermut naammagittaalliutit suliarisarpai.

Imm. 2. Naammagittaalliut suliami inatsisitigut ataasiakkaatigut maannakkut nammineq soqutigisaqartumit Naligiimmik Pinninnissaq Pillugu Aalajangiisartunut suliaqissutaasinaavoq.

§ 22. Aalajangiisartut 1-imik siulittaasoqarput aammalu 4-nik allanik ilaasortaqlutik.

Imm. 2. Naalakkersuisut siulittaasoq, inatsisilerinikkut ilinniagartuutut angusilluni soraarummeersimasoq, Nunatta eqqartuussisuanit inassuteqarneq malillugu, toqqassavaat.

Imm. 3. Naalakkersuisut kattuffinnit, peqatigiiffinnit, sullissivinnit il.il. inassuteqaatit malillugit Naligiimmik Pinninnissaq Pillugu Aalajangiisartunut ilaasortat toqqassavai. Inassutigineqartut suliassa qarfinni una Inatsisartut inatsisaanni sammineqartuni ataatsimi arlalinniluunniit suliatigut uppersarsarneqartunik ilisimasaqassapput, aalajangiisartut taamaallutik taamaattoqarsinnaatillugu tunngavinnik § 4-mi taaneqartunik tamanik ataatsimut ilisimasaqassapput.

Imm. 4. Naalakkersuisut Naligiimmik Pinninnissaq Pillugu Aalajangiisartut katitigaaneranni, suaassutsit aappaanniittut annerpaamik ilaasortamik ataatsimik amerlanerutillugit, toqqaassapput.

Imm. 5. Siulittaasoq aammalu ilaasortat 4-t piffissamut ukiunik 3-nik sivilissusilimmut toqqarneqassapput. Ilaasortaq toqqarneqartoq ilaasortaajunnaarpat, ilaasortaajunnaarsinneqarpat imaluunniit suliassani isumagisinnaajunnaarpagit, nutaamik toqqaasoqassaaq. Qinigaaqqittoqarsinnaavoq.

§ 23. Naalakkersuisut tunngavissarititaasut ataani allassimasut ilaat ataaseq arlalilluunniit naammassineqarsimappata, Naligiimmik Pinninnissaq Pillugu Aalajangiisartuni ilaasortaq tunuartissinnaavaat:

- 1) Ilaasortaq Inatsisartut inatsisaat una naapertorlugu ilaasortap suliassaannik suliarinninnermini annertuumik sumiginnaappat.
- 2) Inatsisartut inatsisaat una naapertorlugu ilaasortap suliassaannik toqqissisimanartumik ilaasortap suliarinninnissaanut annertuumik tatiginanngitsumik, ilaasortaq iliuuseqarpat.
- 3) Ilaasortaq tunuartinneqassasoq Naligiimmik Pinninnissaq Pillugu Aalajangiisartuni ilaasortat 3-t inassutigippassuk, aammalu Naalakkersuisut pissutsinik misissuereernermini ilaasortaq tunuartinneqassasoq isumaqarpata.

Imm. 2. Naalakkersuisut aalajangiisartut imatut pippata Naligiimmik Pinninnissaq Pillugu Aalajangiisartunik tunuartsisinnaapput:

- 1) arlaleriarlutik ukiumoortumik nalunaarusiunngippata,
- 2) aalajangiisartut suliassanik § 21-mi taaneqartunik suliqaanngippata.

§ 24. Aalajangiisartut, kapitali 9 naapertorlugu, Matumani Inatsisartut inatsisaata inatsisip unioqqutinneqarneranut taarsiilluni akiliinissamik aalajangiisinnaapput.

§ 25. Aalajangiisartut naammagittaalliutit pisortat ingerlatsineranni oqartussamut allamut suliakkiissutaasinnaasut, taassuma suliame aalajangiinissaa sioqqullugu, suliarisinnaanngilaat.

Imm. 2. Suliata eqqartuussivimmi suliarineqartut, aalajangiisartut suliarisinnaanngilaat.

Imm. 3. Suliassa aalajangiisartuni suliarineqarluni ingerlanneqartillugu, suliame peqataasut suliassa eqqartuussivinnut suliakkiissutigisinnaanngilaat.

Imm. 4. Naammagittaalliut, sulisitsisut sulisartullu akornanni inatsisilerinermik aqqissuussani malittarisassat malillugit, aamma manna inatsimmi malittarisassat malillugit suliarineqarsinnaappat taarsiiffigitinneq aamma soraarsitsineq pillugit, tak. §§ 50-53, sulisitsisut sulisartullu akornanni inatsisilerinermik aqqissuussani taakkunani suliarineqarsinnaanera isumaqatigiisummut ilaasut isumaqatigiissutigisinnaavaat.

§ 26. Naligiimmik Pinninnissaq Pillugu Aalajangiisartut suliassaminnut naapertuuttumik suleriaasissartik namminneerlutik aalajangersassavaat.

§ 27. Naligiimmik Pinninnissaq Pillugu Aalajangiisartunut ilaasortat, Inatsisartunut Naalakkersuisunut il.il. ilaasortat akissarsiaat pillugit Inatsisartut Inatsisaanni kapitel 7-imi malittarisassat naapertorlugit, akissarsiaqassapput. Aningaasartuutit taakku aalajangiisartunut Nunatta Karsianit ukiumoortumik tapiissutit iluanni akilerneqassapput.

Naammagittaalliutinik suliarinnineq

§ 28. Atuisartoqarnermut Unammilleqatigiinnermullu Aqutsisoqarfik Naligiimmik Pinninnissaq Pillugu Aalajangiisartunut allattoqarfeqartitsissaaq.

Imm. 2. Allattoqarfiup aalajangiisartut naammagittaalliutinik suliarinninnissaat piareersassavaat. Naammagittaalliutit allaganngorlugu tunngavissalimmik suliarineqassapput.

§ 29. Aalajangiisartut naammagittaalliutip suliarineqarneranut atatillugu suliarnut paasisimasalimmit oqaaseqaatinik piniarsinnaapput.

Imm. 2. Ataatsimoorluni isumaqatigiissutini aalajangersakkat unioqqutinneqarnerat pillugu suliassat suliarineqarneranni, aalajangiisoqarsinnaalinnginnerani isumaqatigiisummi pineqartumi peqataasunit oqaaseqaammik aalajangiisartut piniassapput.

§ 30. Aalajangiisartut suliarni naammagittaalliortoq taparserneqarsinnaanngippat, naammagittaalliutip suliarineqarnissaa itigartissinnaavaat.

Imm. 2. Naammagittaalliutit aalajangiisartunit suliarineqarnissaat naleqquttuunngitsutut nalilerneqartut, allattoqarfiup itigartissinnaavai. Naammagittaalliuteqarsinnaatitaasup aalajangiinerup aalajangiisartunut saqqummiunneqarnissaa allattoqarfimmut noqqaassutigisinnaavaa. § 28, imm. 2-mi aamma § 29-imi aamma § 32-imi aalajangersakkat taamatuttaaq atorneqassapput.

§ 31. Aalajangiisartut aalajangiisnaatitaaneq siulittaasumut suliakkiissutigisinnaavaat.

Imm. 2. Tamatumunnga maleruagassat erseqqinnerusut aalajangiisartut suleriaasianni aalajangersarneqassapput.

§ 32. Aalajangiisartut aalajangiineri allaffissornikkut oqartussamut allamut suliakkiissutigineqarsinnaanngillat.

Imm. 2. Aalajangiisartut suliarni aalajangiippata aalajangiinerup eqqartuussivinnut suliassanngortinneqarnissaanut periarfissaq pillugu allattoqarfiup illuatungeriit ilisimatissavai.

Imm. 3. Aalajangiinerit tunngaviusunut tunngassutillit, kinaassutsinik takuneqarsinnaatitsinnginneq naammattumik pisinnaappat aammalu suliarni peqataasut illersorneqarsinnaappata, kinaassutsit takuneqarsinnaatinnagit tamanut saqqummiunneqassapput. Suliassarli tamanit ilisimaneqareerpat, aalajangiinerit tamanut saqqummiunneqarsinnaapput.

§ 33. Ukiut tamaasa kingusinnerpaamik 1. maj aalajangiisartut ukiup siuliani suliaqarsimanertik pillugu nalunaarummik tunniussissapput. Nalunaarut aamma digitalinngorlugu kalaallisut danskisullu tamanut saqqummiunneqassaaq.

Kapitali 7

Suiaassutsit akornanni nalogiissitaaneq immikkut pillugu

Pisortat ataatsimiititaliaanni, siunnersuisoqatigiinni, isumalioqatigiissitaanni assigisaannilu suiaassutsit katitigaanerat

§ 34. Pisortat ataatsimiititaliai, siunnersuisoqatigiivi, isumalioqatigiissitaliai assigisaallu Naalakkersuisunit pilersinneqartut, katitigaanerminni suliaassutsini aappaaniittut annerpaamik ataatsimik amerlanerussapput.

§ 35. Naalakkersuisut siulersuisunut, sinniisoqarfinnut assigisaannullu ataatsimoorluni aqutsisunut ilaasortanik toqqaasoqartillugu, suiaassutsini aappaaniittuni ilaasortaq ataaseq annerpaamik ataatsimik amerlanerutillugu toqqaasoqassaaq.

Imm. 2. Naalakkersuisut siulersuisunut, sinniisoqarfinnut imaluunniit assigisaanik ataatsimoorluni aqutsisunut ilaasortat ilaannaannik toqqaallutik pisoqartillugu, Naalakkersuisut imm. 1-imi aalajangersagaq apeqqutaatinnagu, ataatsimoorluni aqutsisuni tamarmiusuni suiaassutsit akornanni nalogiimmik amerlassusiliisimaneq ersersillugu, ilaasortanik toqqaassapput.

§ 36. Oqartussat imaluunniit kattuffiit inatsimmi §§ 34 aamma 35 naapertorlugit siulersuisunut, ataatsimiititalianut il.il. ilaasortassanik, tamakkiisumik ilaannaasumilluunniit Naalakkersuisunit toqqarneqartussanik, inassuteqartussat, suiaassutsini tamani ataaseq siunnersuutigissavaat. Ilaasortassanik amerlanerusunik siunnersuuteqartoqarpat, siunnersuutigineqartut suiaassutsini tamani amerlaqatigiissapput.

Imm. 2. Oqartussat, kattuffiit il.il. immikkut pissutissaqarpata imm. 1-imi aalajangersagaq avaqqussinnaavaat, taamaattoqarpallu Naalakkersuisunut tunngavilersorluakkamik allassapput.

Imm. 3. Ilaasortassanik inassuteqarneq aalajangersakkamut naapertuuttumik pisimangippat, inassuteqaat pineqartoq Naalakkersuisut tunngavigisariaqanngilaat. Taamatut pisoqartillugu oqartussaq imaluunniit kattuffik pineqartoq nutaamik inassuteqassaaq. Imm. 2 naapertorlugu tunngavilersuut akuerineqarsinnaanngippat, assigisaa atuutissaaq. Kattuffik Naalakkersuisunut inassuteqaateqanngippat, ilaasortaq aammattaaq sinniisusaqartillugu Naalakkersuisunit toqqarneqassaaq.

Aningaasarsianut naatsorsueqqissaarneq suiaassutsinut agguagaasoq

§ 37. Naatsorsueqqissaartarfik minnerpaamik ukioq allortarlugu suiaassutsinut agguagaasumik aningaasarsianut naatsorsueqqissaartarpoq.

Kapitali 8

Kalaallit Nunaanni Nalogiissitaanermut siunnersuisoqatigiit

Naligiissitaanermut siunnersuisoqatigiit suliassaat

§ 38. Naligiissitaanermut siunnersuisoqatigiit suaassutsit akornanni naligiissitaanerup siuarsarnissaa, naligiissitaanikkut pisinnaatitaaffiit soqutigisallu suliassarai, kiisalu inuiaqatigiinni suaassutsit akornanni naligiissitaaneq ukkatarissallugu, taannalu pillugu paasissutissiisassallutik. Naligiissitaanermut siunnersuisoqatigiit pissutsinik naligiissitaanermut tunngasunik, piumaffigineqarnermikkut imaluunniit nammineq suliniuteqarnermikkut, misissuisinnaapput. Naligiissitaanermut siunnersuisoqatigiit peqataasut allanut misissuinerminni il.il. akileeqqusinnaapput. Naligiissitaanermut Siunnersuisoqatigiit ingerlatsisut allat sinnerlugit misissuinerminik il.il. akiliisitsinnaapput.

Imm. 2. Naligiissitaanermut siunnersuisoqatigiit:

- 1) Inatsisartut inatsisaata atorneqarnera, tamatumalu inuiaqatigiinni qanoq atuutsinneqarnera malinnaaffigissavaat.
- 2) Naalakkersuisunit ujartuisoqarnerani oqaaseqaateqassapput. Oqaaseqaatit tamanit takuneqarsinnaassapput.
- 3) sammisassanik paasissutissiinertut oqallitsitsilertussatullu ittunik aallartitsissaaq.
- 4) pisortat ingerlatsinerannut taakkulu sullissiviinut, suliffeqarfinnut namminersortunut inuiaqatigiinnilu ataasiakkaanut siunnersuisutut sulissapput.

Imm. 3. Naligiissitaanermut siunnersuisoqatigiit aammattaaq:

- 1) Inuiaqatigiinni naligiissitaaneq pillugu ilisimasanik katersissapput, ineriartortitsissapput aammalu paasissutissiisassapput.
- 2) naligiissitaaneq pillugu paasissutissat tamanut, ilaatigullu ilinniartunut, ilisimatuunut, suliaqartunut politikerinullu malinnaaffigineqartussanngorlugit nutartertassavai

Imm. 4. Naligiissitaanermut siunnersuisoqatigiit aammattaaq:

- 1) pisortat sullissiviit suliffeqarfinnullu naligiissitaanermut aallartitanut ikiutissapput.
- 2) naligiissitaanermut iliuusissat pillugit isumassarsianik, siunnersuutininik suliniutissanillu inuiaqatigiinni naligiissitaanermik pitsanngorsaasussanik, oqartussanut il.il. suliaqassapput.
- 3) lleqquusumik suaassutsini inissisimanermi nuanninngitsortasut allannngortinnissaat siunertaralugu paasissutissiinermik suliaqarneq ingerlatissavaat.
- 4) Pisortani sullissiviit kattuffillu allat, suaassutsimut attuumassutilimmik persuttaasarnerup akiorniarnissaanik siunertaqartumik, suleqatigissavai.
- 5) Suliffeqarnermi naligiimmik aningaasarsiaqarnissaq aammalu suaassutsikkut assigiinngisitsinerminni ajornartorsiuteqarfiusut sulissutigissavai.

Imm. 5. Naligiissitaanermut siunnersuisoqatigiit ukiut tamaasa kingusinnerpaamik 1. aprilimi

Naligiissitaanermut siunnersuisoqatigiit suliaqarnerannut allaganngorlugu nalunaarummik Naalakkersuisunit Inatsisartunullu saqqummiissaaq. Nalunaarut tamanut saqqummiunneqassaaq.

§ 39. Naligiissitaanermut siunnersuisoqatigiit suliassai inatsimmi aalajangersagaasut aallaavigalugit Naligiissitaanermut siunnersuisoqatigiit ukiumoortumik ukkatarinniffi suliniuteqarfilu Naligiissitaanermut siunnersuisoqatigiinnut allattoqarfiup aalajangersassavai.

Imm. 2. Naligiissitaanermut siunnersuisoqatigiit naligiissitaanermut suliassaqarfimmi periusissianik ineriartortitsinerannut allattoqarfik ikiutissaaq.

§ 40. Inatsisartut, Naalakkersuisut pisortanilu oqartussat allat, apeqqutini nalinginnaasuni tamani, naligiissitaanermut pingaaruteqartuni, Naligiissitaanermut siunnersuisoqatigiit isumasiorfigisinnaavai.

§ 41. Naligiissitaanermut siunnersuisoqatigiit suliassa qarfiannut tunngasut pillugit killilersorneqaratik oqaaseqarnissamut Naligiissitaanermut siunnersuisoqatigiit pisinnaatitaapput. Oqaaseqaateqarnerit kimut saaffiginnissanersut, Naligiissitaanermut siunnersuisoqatigiit nammineerlutik aalajangissavaat.

Naligiissitaanermut siunnersuisoqatigiit aaqqissuussaanerat

§ 42. Naalakkersuisut naligiissitaanermut siunnersuisoqatigiit politikkimut attuumassuteqanngitsut pilersissavai. Naligiissitaanermut siunnersuisoqatigiit katillugit arfineq marlunnik ilaasortaqarput.

Imm. 2. Siulittaasoq ilaasortallu allat piffissamut ukiunik sisamanik sivilissusilimmut toqqarneqassapput. Ilaasortaq toqqarneqartoq ilaasortaajunnaarpat, ilaasortaajunnaarsinneqarpat imaluunniit suliani isumagisinnaajunnaarpagit, nutaamik toqqaasoqassaaq.

§ 43. Naalakkersuisut qinigassatut inassutigineqartut akornanni siulittaasumik toqqaassapput.

Imm. 2. Naalakkersuisut kattuffiit, sulinerimik inuussutissarsiuteqartunik imaluunniit sulisitsisunik sullissisut, inassuteqarnerisigut Naligiissitaanermut siunnersuisoqatigiinni ilaasortamik ataatsimik marlunnilluunniit toqqaassapput.

Imm. 3. Naalakkersuisut kattuffiit, sullissiviit il.il. meeqqanik inuusuttunillu sullissisut imaluunniit meeqqat inuusuttullu pillugit suliaqartut, inassuteqarnerisigut Naligiissitaanermut siunnersuisoqatigiinni ilaasortamik ataatsimik marlunnilluunniit toqqaassapput.

Imm. 4. Naalakkersuisut kattuffiit, peqatigiiffiit, sullissiviit il.il. ilinniartitaanermik, meeqqat atuarfiannik ilisimatusarnermilluunniit suliaqartut, inassuteqarnerisigut Naligiissitaanermut siunnersuisoqatigiinni ilaasortamik ataatsimik marlunnilluunniit toqqaassapput.

Imm. 5. Naalakkersuisut kattuffiit, peqatigiiffiit, sullissiviit il.il., suaassutsit inissisimaffinik imaluunniit suaassutsit ataasiakkaat soqutigisaannik pisinnaatitaaffinillu suliaqartut inassuteqarnerisigut ilaasortamik ataatsimik marlunnilluunniit toqqaassapput.

Imm. 6. Naalakkersuisut ilaasortat sinnerinik inuiaqatigiinni naligiissitaanermik soqutigisaqartut sinniisaannik toqqaassapput.

Imm. 7. Kattuffiit, peqatigiiffiit aamma sullissiviit sorliit, siunnersuisoqatigiinnut ilaasortassanik innersuussisinnaasut, aamma ataatsimiigiaqqusinnermi aamma innersuussuussutininik nalunaaruteqarnerini ingerlatseriaatsit pillugit malittarisassanik erseqqinnerusunik Naalakkersuisut aalajangersaasinnaapput.

§ 44. Naalakkersuisut Naligiissitaanermut siunnersuisoqatigiinni ilaasortaq piffissap ukiunik sisamanik sivilissusillip iluani ilaasortaajunnaartissinnaavaat, tunngavissarititaasut uku naammassineqarpata:

- 1) Ilaasortaq Inatsisartut inatsisaat naapertorlugu ilaasortap suliassaannik suliarinninnermini annertuumik sumiginnaappat.
- 2) Inatsisartut inatsisaat naapertorlugu ilaasortap suliassaanik toqqissisimanartumik ilaasortap suliarinninnissaanut annertuumik tatiginanngitsumik, ilaasortaq iliuuseqarpat.

3) Ilaasortap tunuartinneqarnissaa Naligiissitaanermut siunnersuisoqatigiinni ilaasortanit pingasunit allakkatigut tunngavilersugaasumillu inassutigineqarpat, aammalu Naalakkersuisut misissuereernerminni isumaqarpata ilaasortaq siunnersuisoqatigiinni ilaasortaanissamut naleqqukkunnaartoq.

Imm. 2. Naligiissitaanermut Siunnersuisoqatigiinni ilaasortanik Naalakkersuisut aamma soraarsitsisinnaapput, siunnersuisoqatigiit:

- 1) ukiumoortumik nalunaarusianik naatsorsuutinillu Naalakkersuisunut tunniussinngippata, imaluunniit
- 2) suliassanik, § 38, imm. 2-mi aamma 3-mi taaneqartunik suliaqanngippata.

§ 45. Naligiissitaanermut siunnersuisoqatigiit §§ 38-41 naapertorlugit suliassaminnut naapertuuttumik suleriaasissartik nammineerlutik aalajangersassavaat.

Naligiissitaanermut siunnersuisoqatigiit allattoqarfiat

§ 46. Naligiissitaanermut siunnersuisoqatigiit ulluinnarni suliassaminnik isumaginnittussamik allattoqarfimmik pilersitsissapput.

Imm. 2. Naligiissitaanermut siunnersuisoqatigiit Namminersorlutik Oqartussani sulisunut maleruagassat sukkulluunniit atuuttut malillugit allattoqarfimmi sulisunik atorfnitsitsinissamut soraarsitsinissamullu aalajangiisinnatitaapput.

Aningaasalersuineq

§ 47. Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisaanni kapitali 7-imi malittarisassat malillugit Naligiissitaanermut Siunnersuisoqatigiinni ilaasortat aningaasarsianik il.il. tiguisassapput. Aningaasartuutit taakku Nunatta Karsianit siunnersuisoqatigiit ukiumoortumik tapiissutisiaannit akilerneqartassapput.

Missingersuutit naatsorsuutillu

§ 48. Naligiissitaanermut siunnersuisoqatigiit ukiup tullianut missingersuutitut siunnersuummik ukiumoortumik Naalakkersuisunut saqqummiissapput. Siunnersuut isertitassatut aningaasartuutissatullu naatsorsuutigineqartunut missingersuineramik imaqassaaq. Peqatigisaanik ukiunut tulliuttunut Nunap Karsiata tapiissutissaasa annertussusissaannut siunnersuut saqqummiunneqassaaq.

§ 49. Naligiissitaanermut siunnersuisoqatigiit ukiumoortumik naatsorsuutinik, kukkunerisiisumit kukkunerisiorneqartussanik, suliaqassapput.

Imm. 2. Ukiumut naatsorsuutit inernerik kukkunerisiukkat ukiut tamaasa kingusinnerpaamik 1. september Naalakkersuisunut tunniunneqartassapput.

Kapitali 9

Taarsiiffigitinneq, uppersaasussaaneq pineqaatissiisarnerillu

§ 50. Inatsisartut inatsisaata unioqqutinneqarnerani inuit pisinnaatitaaffimmik inarlerneqartut taarsiiffigineqarsinnaapput.

Imm. 2. Inuk §§ 4-7 aamma § 15 malillugit piumasaqaammik saqqummiussisimanini pissutigalugu iluaqutaanngitsumik iliuuseqarfigineqarpat imaluunniit iluaqutaanngitsunik kinguneqartumik pineqarpat, taarsiiffigineqarnissaa akuerineqarsinnaavoq.

§ 51. Sulinermik inuussutissarsiuteqartoq §§ 15 imaluunniit 17 unioqqutillugu soraarsinneqarpat, sulisitsisup taarsiivigineqarnera akilissavaa. Taarsiissutissaq sulinermik inuussutissarsiuteqartup piffissaq atorfeqarsimanera suliamilu allat pisut eqqarsaatigalugit aalajangersarneqassaaq.

§ 52. Sulinermik inuussutissarsiuteqartoq, aningaasarsiaanni imaluunniit aningaasarsiaanun atugassarititaasuni § 15 unioqqutinneqarpat, aningaarsiaasa assigiinngissutaannut naapertuuttumik taarsiivigineqarsinnaavoq.

§ 53. Sulinermik inuussutissarsiuteqartoq § 15 naapertorlugu assigiinngisitsinnginnissaq pillugu piumasaqaammik saqqummiussisimanera pissutigalugu soraarsinneqartoq, taarsiivigineqarsinnaavoq. Taarsiissutissaq sulinermik inuussutissarsiuteqartup piffissaq atorfeqarsimanera suliamilu allat pisut eqqarsaatigalugit aalajangersarneqassaaq.

§ 54. Inuup inarligaalluni isumaqartup, §§ 4-7 aamma § 15 naapertorlugit pissusiviusuni pisut, toqqaannartumik imaluunniit toqqaannanngitsumik assigiinngisitsisoqartoq pasitsannerminut pissutaasut uppersarsarpagit, illuatungiusup Inatsisartut inatsisaanni matumani assigiinngisitsinnginnissaq pillugu malittarissat unioqqutinneqanngitsut uppersarsaassaaq.

Imm. 2. Inuk assigiinngisitsinnginnissaq pillugu piumasaqaammik saqqummiussereernerata kingorna, §§ 4-7 aamma § 15 naapertorlugit, kingusinnerpaamik qaammatit aqqaneq marluk iluanni soraarsitaappat, soraarsitsineq suliffeqarfimmi pissutsit naapertorlugit tunngavilersorluagaasoq, sulisitsisup uppersarsassavaa.

Imm. 3. Naartunini pillugu sulisitsisumut nalunaarutiginnereernermini inuk soraarsinneqarpat, sulisitsisup soraarsitsineq naartunermut attuumassuteqanngitsoq uppersarsassavaa.

§ 55. § 20-imik unioqqutitsineq Kalaallit Nunaanni pinerluttulerinermi inatsit malillugu pineqaatissinneqarnermik kinguneqarsinnaavoq.

Imm. 2. Ingerlatseqatigiiffiit il.il. (inatsisitigut pisinnaatitaasut pisussaataasullu) Kalaallit Nunaanni pinerluttulerinermi inatsimmi kapitali 5-imi malittarisassat malillugit pinerluttulerineq pillugu inatsiseqartitsineq malillugu akisussaatinneqarsinnaapput.

Imm. 3. Imm. 1-imiit 2 ilanngullugu akiliisitsissutit aalajangerneqartut, Nunatta Karsiata pissavai.

Kapitali 10

Atuutilersitsineq, ikaarsaariarneq atorunnaarsitsinerlu pillugit aalajangersakkat

§ 56. Inatsisartut inatsisaat ulloq 1. juli 2024 atuutilissaaq.

Imm. 2. Peqatigisaanik angutit arnallu naligiissitaanissaat pillugu Inatsisartut inatsisaat nr. 3, 29. november 2013-imeersoq atorunnaarsinneqarpoq.

Imm. 3. Peqatigisaanik Race il.il. pissutigalugit assigiinngissitsinissamik inerteqquteqarneq pillugu inatsisip Kalaallit Nunanut atuutilersinneqarnera pillugu peqqussut nr. 27, 4. februar 1972-imeersoq atorunnaarsinneqarpoq.

Imm. 4. Inatsisartut inatsisaat malillugu Naligiissitaanermut Siunnersuisoqatigiit nutaat, ulloq 1. januar 2025 sulilertussat, toqqarneqassapput. Angutit arnallu naligiissitaanissaat pillugu Inatsisartut inatsisaat nr. 3, 29. november 2013-imeersoq malillugu Naligiissitaanermut Siunnersuisoqatigiit kingusinnerpaamik toqqarneqartut, Naligiissitaanermut Siunnersuisoqatigiit nutaat sulilernissaasa tungaannut, Naligiissitaaneq assigiinngisitsinnginnissarlu pillugit Inatsisartut inatsisaat manna malillugu sulissapput.

Kalaallit Nunaanni Namminersorlutik Oqartussat, ulloq 3. juuni 2024

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut